

# INUIT ATAQATIGIIT INATSISARTUNI



UKA2023/7  
26. september 2023  
Asii Chemnitz Narup

## **2024-mut Aningaasanut Inatsisissatut Siunnersuut**

(Aningaasaqarnermut Naalakkersuisoq)

### **Oqaaseqaat**

#### **Qulequtaq: Aaqqissuusseqqinnerit Siunissamut**

2024-mut aningaasanut inatsisissatut siunnersuummut Aningaasaqarnermut Naalakkersuisumut Naalakkersuisunullu qujavunga.

Aningaasatigut oqimaaqatigiissitsiniarnerup qanoq ajornartiginera kikkut tamarmik nalunngilaat: kissaatit pisariaqartitallu maanna aningaasatigut pisinnaasatsinnut ataqatigiissinniarnat.

Nunarsuarmi pissutsit arlallit aningaasaqarnitsinnik sunniisinnaapput. Ukiunilu aggersuni ajoraluartumik pitsaannginnerusumik sunniissapput:

Kinami aningaasaqarnikkut siuariartupiloorneq ukiuni 40-ni aatsaat unittoorpoq.

EU-p nalaappai ajornartorsiutit annertuut aningaasarpassuarnik aningaasaliinissamik aallunneqarnissamillu piumasaqaateqarfiusussat.

Ukiuni aggersuni illersornissaq, sillimaniarneq, nunasisut sulisussaaleqinerlu, akuulersitsiniarnermi ajornartorsiutit minnerunngitsumillu klima Europami sammineqassaaq.

Peqatigisaanillu USA-mi aappaagu præidentimut qinersisoqassaaq.

Trump qinigaassappat, Trumpitulluunniit eqqarsartaasilik qinigaassappat, aningaasaqarnikkut sillimaniarnikkullu politiki siumut eqqoriaruminaatsorujussuanngussaaq.

Pitsaasut pitsaanngitsullu tamaasa atugaralugit nunarsuarmioqataavugut. Ukiorpasuarni nunarsuaq inuuffigalugu aatsaat taamak ajornakusoortigalunilu aarlerinartigaaq.

Aningaasaqarnikkut sillimaniarnikkullu nukittuunik ileqarnissarput pisariaqartipparput. Suleqatigiinnissaq qanimullu attaveqarnissaq pisariaqartippavut.

Kalaallit Nunaata tunngaviusumik aningaasaqarnikkut ajornartorsiutai tammarnaviangilaat. Aningaasanut inatsisikkut ugguuna peerunnaviangillat.

#### Makkumi akiorpavut:

- Inuiaqatigiinni aningaasaqarnikkut assigiinnginnerujussuit naligiinnginnerujussuarlu.
- Inuiaqatigiinni ilinniarsimassutsikkut piginnaasatigullu assigiinnginnerujussuit.
- Meeqqat inuusuttullu amerlavallaartut atugarliornerat.
- Immitsinnut ungasissorujussuulluta najugaqarnerput, inunnullu ikittuinnarnut attaveqaasersuutit akisoorujussuit.
- Innuttaasut ukiumikkut katitigaaneranni unammilligassat annertoorujussuit, inuusuttullu taamak amerlatigisut ilinniarnermik kingorna utertannginnerat.
- Nunarput qimallugu aallarartut
- Inuussutissarsiorfimit isertitagut inuussutissarsiorfimit ataasiinnangajammeernerat: tassalu aalisarnermit
- Danmarkimit tapiissutit suli isertitatsinnit tamarmiusunit 54 procentiunerat.
- Kiisalu sulisussaaleqineq

Ajornartorsiutivut tunngaviusut iliuuseqarfiginngikkutsigit puttaamit puttaamut pisseqattaartuassaagut, aamma ukiuni aggersuni aningaasanut inatsimmit aningaasanut inatsimmut tullermut.

Aningaasaqarnermi qissiatut sarfaq malillugu ingerlajuassaagut – avataani pisut naalagaatillugit – nunatsinni pissutsit pitsanngorsarnissaannut pisariaqartunik iliuuseqanngilluinnarluta.

Iliuseqanngikkutta pisortat aningaasartuutaat pisortat isertitaannit qaffakkiartornerussapput. Pissutsillu taamaaginnarpata Nunatta Karsia amigartoortualissaaq. Taava patajaassutsitsigut ajornartorsiulissaagut iliuseqarfiginikuunngisatsinnik. Aningaasaqarnermik Siunnersuisoqatigiit nalunaarutaat kingulleq ullualuit matuma siorna saqqummersoq malillugu, tamanna ukiumut 1,3 mia. kr-nik aningaasalersuutissatsinnik amigaateqalernitsinnik nassataqassaaq.

Aningaasaqarnermik imminut napatinnissaq Inuit Ataqtigiit anguniagaraat. Partiillu allat assigalugit aningaasartuuteqarfiussanik amerlasuunik kissaateqaraluarluta, taamaattoq pisortat aningaasaqarnerata patajaatsuunissaata qulakkeernissaa pisariaqartuusoq takusinnaavarput. Pisortat isertitaat aningaasartuutaallu ungasinnerusoq isigalugu oqimaaqatigiittariaqarput.

Ukiut marluk matuma siorna Namminersorlutik Oqartussat kommunillu aningaasartuutaasa annertusiartornerannik killiliissalluta Inatsisartuni aalajangeratta, pingaaruteqarluinnartumik alloriarpugut (Kommunit Namminersorlutillu Oqartussat missingersuutaat naatsorsuutaallu pillugit inatsit, ulluinnarni missingersuusionermut inatsimmik taaneqartartoq takuuk). Taamaalilluta aningaasartuutit annerpaaffissaqartariaqarnerannik malittarisassiorpugut. Malittarisassat taakku pisortat aningaasaataasa qanorpiaq atorineqarnissaannut sakkortuumik piumasaqarput.

Pisortalli aningaasartuutaasa appartinnissaat kisimi naammangilaq. MAANA pisortat isertitaat qaffattariaqarpavut. Taamattaq pingaarnersiuisinnaanermut piumassuseq sapiissuserlu misilittarneqartussanngorput.

Aningaasat nunatta isertittagaasa amerlisarneqarnissaannut iluaqutissatut inuussutissarsiutit 2023-mi siuarsarneqarnissaat ukkatarissallugu ukioq mannamut Aningaasanut Inatsisissaq naammassigatsigu isumaqatigiissutigaarput. Isumaqatigiissummut allanneqarpoq inuussutissarsiornerup aningaasatigut siuarsarneqarnissaanut periusissiamik saqqummiussivigineqarumaartugut. Inuit Ataqtigiinnit naatsorsuutigisimagaluarparput periusissiaq taanna maanna atuarneqarsinnaalereersimassasoq. Pakatsivugulli. Aningaasaqarnermut Ataatsimiititaliaq iluunngarluta qinnuigissavarput isertitat amerlisarneqarnissaannut aamma inuussutissarsiutit siuarsarneqarnissaannut apeqqutit isumaliutissiissutitip suliarineranut ilanngullugit suliarissagaat.

\*\*\*\*\*

Aningaasaqarneq imminut napatittoq pisortallu ingerlatsiviat siunissamut isumannaagaq imminneq pilernaviangillat. Taammaattoqarnissaanut aaqqissuusseqqinnissat pisariaqarput. Aaqqissuusseqqinnissaq pisariaqartinneqartorujussuuvoq. Aqqissuusseqqinnerit aningaasaqarnitsinnik patajaassutsitsinnillu nukittorsaassapput.

Naalakkersuisut ukioq kaajallangajallugu Attassinissamut Siuariartornissamullu Pilersaarut 2-mik aaqqissuusseqqinnissamut siunnerfinnik sisamanik ikorfartuisussamik ilungersorlutik suliaqarsimanerat Inatsisartut ilisimaaraat.

Taanna kingusinnerusukku uterfigissavara.

### **Aningaasaqarnikkut inissisimalluarneq**

Nunatta aningaasaqarnikkut inissisimanagera imminermini pitsaavoq – tunngaviusut akuersaaraanni : tassa ataatsimoortumik tapiissutit aamma inuusutissarsiorneq ataasiinnarmik toqqammaveqarnera.

Aalisarnerup ukiuni makkunani inissisimalluarnerata attaveqaasersuutinullu aningaasaliissutit annertunerat kiisalu suliffissaaleqisut ikittuinnaanera kingunerisaannik aningaasarsiornerput pitsaasumik inissisimavoq. Unammilligassavulli tunngaviusut suli taakkuujuarsinnarput. Maanna killiffipput – imminermini pitsaasoq – nuannaarutigisinnaavarput, imaluunniit aaqqissuusseqqinnissamik piumasaqaatit naaperiaanerillu pisariaqartut namminiilivinnissap aningaasaqarnerullu imminut napatittup nassatarisassai qiviarlugit sullineq aallartissinnaavagut. Inuit Ataqtigii taakku orniginartinneruagut. Neriuppugut tassunga kissaat piumassuserlu Inatsisartuni pimoorunneqassasut.

### **AIS 2024**

Naalakkersuisut aningaasanut inatsisissatut siunnersuutaat meeqqat inuusuttullu, utoqqartatta peqqinnissaqarfimmullu pitsanngorsaanissamut siunnersuutinik imaqarpoq.

**Meeqqanut inuusuttunullu** pitsanngorsaatissat ukiumut 33,7 mio. kr-nik naleqarput. Tassani katsorsaanikkut suliniutinik pitsanngorsaanerit, ilaqutariinnut

meeqqanik paarsisartunut pitsanngorsaanerit meeqqanullu tapiissutinut malitaarisassat nutaat ilaapput. Taamattaaq inoqarfinni minnerusuni inuusuttunut piginnaanngorsaalluni pikkorissartitsinerit Ado Lyngellu Atuarfianut aningaasaliissutit qaffanneqarnissaat ilaapput.

Aningaasaliissutit qaffanneqarnissaat tapersorsorpavut.

Meeqqanulli tapiissutinut malittarisassat nutarternissaannut tunngatillugu, taakku meeqqat piitsuullutik inuunerannik misinnartumik akiuiniarnermut iluaqutaanissaat Inuit Ataqtigiinnit kissaatigilluinnarparput.

Meeqqat atugarliortut ikiorserneqarnissaannut millionilippassuarnik Inatsisartut Kommunnillu aningaasaliissutigisarpaat. Aningaasaliisarneq qulakkeertuartariaqarparput. Inuit Ataqtigiinni isumaqarpugut Ulluunerani meeqqueriviit aamma meeqqat atuarfii ukkatarinerulertariaqarivut.

Upperaarput meeqqat TAMARMIK ineriartorluarnissaminnut periarfissaqarnissaannik Naalakkersuisoqarfik nutaaq qulakkeerinnissasoq.

Ingerlatsinerup qaffasissumik pitsaassusillip qulakkiissavaa meeqqat TAMARMIK qaamasumik siunissaqarnissaat, meearlu kinaluuniit pisinnaasaminnik sikkerartitsisinnaalissasoq. Meeqqat tamarmik nuannerluinnartumik misigisaqarnissaminnut periarfissaqarnissamut pisinnaatitaaffeqarput.

Tamatuma iluatsinnissaannut Naalakkersuisoq qinnuigissavarput meeqqat atugarliuutaat aamma ikiorserneqarnissaminnut pisariaqartitaannut paasissutissanik tutsuinarluinnartunik peqalernissarput isumannaarniaqqullugu. Aatsaat taamaaliornermi meeqqat inuunerissuunissaat aqutissiuussinnaassavarput.

## **Utoqqaat**

Aappariinnut utoqqalinermi soraarnerussutisianik pitsannguinerit illuatungeriilluni pilersoqatigiinnissamik pisussaaffimmik atorunnaarsitsinikkut pissaaq.

Pitsanngoriaat taanna sulinissamut kajuminnerulersitseqataassasoq Inuit Ataqtigiit neriuutigaat. Taamattaaq utoqqaat sivisunerusumik suliffeqarsinnaanerminnik kissaataat suliffeqarnermi eqqaannerusumik periarfissiinernik nassataqassasoq.

Illuatungeriilluni pilersoqatigiinnissamik pisussaaffimmik atorunnaarsitsinermi aamma siusinaartumik soraarnerussutisiaqartut ilaatinneqarnissaat naammaqatigiinnermik takutitsillunilu naapertuuppoq.

Naalakkersuisut utoqqarnut periusissiaat ukioq manna februaarimi tamanut saqqummiunneqarpoq. Tassani suliniutit qulit nassuiarneqarput. Illuatungeriilluni pilersoqatigiinnissamik pisussaaffimmik atorunnaarsitsinissamik siunnersuutikkut suliniutinit quliusunit marluinnaat piviusunngortinneqassapput. Suliniutit amerlanerit annertunerusumik angusaqarfiusimanissaat naatsorsuutigisimagaluarparput, siunissamili ineqarnermut tapiissuteqartarnermut tunngasunut siunnersuut, ineqarnermi aaqqissuusseqqinnissamik suliaqarnermut ilaatinneqartoq paasivarput. Suliniutit tamarmik naammassineqarnissaannut piffissamik pilersaarut qanoq isikkulik Naalakkersuisunit sulissutigineqartoq paasissallugu kissaatigaarput.

### **Peqqinnissaqarfik**

Sakkortuumik tatineqarpoq. Suliassaqarfinni tamani ilungersunartorsiorneraavoq. Killiffik ajornartorsiorfiungaarnertut taagaanni pissussiviusunut tulluunnerussaaq.

Maani nunami inoqarunanngilaq peqqinnissaqarfimmi ajornartorsiutinik nammineq nakorsiatut ilaquuttaminiluunniit nalaatsinerlunermik misigisaqarsimanngitsumik. Sulisut amigarput, utaqqisut amerlavallaarput, utaqqisarneq sivisuallaarpoq, atortullu pisoqaavallaarput. Amerlavallaat nappaateqartut kingusippallaartumik paasineqartarput, tarnikkullu ajornartorsiuteqarnermi ikiorneqarsinnaaneq  
AJORNARPALLAARPOQ.

Peqatigisaanillu tamakku tamarmik aningaasanik naleqarnerat ilisimavarput. Aningaasarpassuarnik naleqarput.

Peqqinnissaq pillugu Isumalioqatigiissitaq pitsanngoriaatissatut kaammattuutinik 119-nik saqqummiussivoq. Kaammattuutit tamaasa ataatsikkut piviusunngortissalugit soorunami akisaqartinngilavut. Pinngitsoornatali ILIUUSEQARTARIAQARPUGUT! Kaammattuutit tusaanngitsuusaarsinnaanngilavut. Peqqinnissaqarfipput tamaat makiteqqittariaqarparput.

Tamanna pissutigalugu Inuit Ataqaatigiit peqqinnissamut politikkerput nutarsarparput sisamanik tigussaasunik pingaarnersiuiffiusumik.

- Meeqqanut inuusuttunullu suliniarneq,
- kræftimik nappaatilinnut suliniarneq,
- tarnikkut nappaatilinnut kiisalu
- katsorsarneqarsinnaangitsunik (soorlu sukkortunut qaffasippallaamillu ammikkut naqitsineqarnermik) nappaatilinnut suliniarneq.

Taakku tamaasa angusinnaajumallugit, nunarpullu tamaat peqqissaanermik sullissinermik pitsanngorsaaniarluta qarasaasiakkut atortorissaarutit isiginiartariaqarpavut, tassani telemedicin ilanngullugu.

2024-mut ukiunullu tulliuuttunut peqqinnissaq pillugu partiinik allanik isumaqatiginninniarnissat aqutugalugit ingerlariaqqinnissatsinnut piareersimalluinnarpugut.

Isumaqatiginninniarnerni peqqinnissaqarfimmik aaqqissuusseqqinnissamik ukiunut tullerni tallimanit qulinut atuuttussamik oqaloqatigiinnissat ilanngunneqarnissaat naatsorsuutigaarput.

Aningaasaliissutit suut Naalakkersuisut aningaasanut inatsisikkut peqqinnissaqarfimmut aningaasaliissutinut ilanngussimaneraat paasissallugu pissangatsigisimavarput.

2024-mi ingerlatsinermut 15,1 mio. kr-t sanaatornermullu – qarasaasiakkut napparsimasunut allattaavimmik nutaamut – 100 mio. kr-nik siunnersuuteqartoqarnera paasivarput.

Ataatsimut isigalugu siunnersuutit taperserpavut - piumasaaqateqarpugulli.

Peqqinnissaqarfitta maannarpiaq ajornartorsiutaani sulisussaaleqineq annertunerpaallunilu pingaarnersaavoq. Sulisut amerlanerit pisariaqartinneqarput, sulisulli aalajangersimasumik atorfillit pisariaqartinneqarput. Sulisussanik nutaanik atorfinitsittineq suliffeqaannartitsinerlu ajornartupilussuvoq. Ajornartorsiut taanna aaqqinneqassappat, peqqissaanermik ilinniarfitsinni amerlanernik ilinniartunngortoqartarnissaa pisariaqarpoq, ilinniarsimasortavullu – nunani allani sulisut - Nunatsinni atorfineqqittariaqarput. Tassani aningaasarsiat aamma pineqarput – taakkulu oqallisiginissaannut qunujaassuseqartariaqarpugut.

Peqqinnissaqarfimmi sulisussanik immikkut nukittunerumillu atorfinitsitsiniarnermut ukiumut 2 mio. kr-nik annertussusilinnik immikkoortitsineq apeqquserparput – aningaasat taakku nammannerpat? Tassami

peqqinnissaqarfimmi sulisunik amigaateqarneq nunarsuarmi nunani amerlasoorpassuarni atugaanera eqqaamalluinnartariaqarparput. Aningaasat taakku qanormita iluaqutaatigissappat, aamma fast trackimik aaqqissuussinermut ilaagaluartilluta?

Qarasaasiakkut napparsimasunut allattaavimmik nutaarluinnarmik pisinissaq annertuumik pisariaqartinneqartoq paasivarput. Nukinginnartuusorlu. Suliassap pingaaruteqarluinnartup taassuma piffissaagallartillugu iliuuseqarfigineqarsimannginnera tupaallaatigaarput.

Taama oqareerluta aningaasartuutip taassuma avaqqunneqarsinnaannginnera ilisimaaraarput. Peqqinnissamik politikimut siunnersuutitsinni nammineerluta TELEMEDICIN ilanngupparput, isumaqaratta telemedicinimik atortut isumalluutigalugit, nunatsinni sumiluunniit najugaqaralarutta, timikkut tarnikkulluunniit nappaateqaralarutta assigiiartumik, sukkasuumik pitsaasumillu sullinneqarsinnaanerput qulakkeerneqassasoq. 100 mio. kr-inili taaneqartuni aamma Telemedicinimik atortut ullumikkut atukkatta nutarternissaat ilaanersoq paaserusupparput?

Aningaasanut inatsisissatut siunnersuummut aningaasaliissutit nutaat ilanngunneqartut saniatigut Peqqissutsimut Naalackersuisoq AIS 2024-mut suli ilanngunneqanngitsunik pitsannguutissanik kisaateqartoq ilisimavarput. Taamattaq ukiuni qulini 800 mio. kr-t 1 mia. kr-llu akornanni sanaartornissamut aningasaasaliinissamut pisariaqartitsisoqarnera ilisimavarput (taamaattoq taakku ilaat aningaasaliissutigineqareerput).

Ataasiinnarli oqaatigisassaavoq: ukiumut tullermut aningaasanut inatsimmut isumaqatiginninniarnernut ataqatigiissillugu partiit peqqinnissaq pillugu isumaqatigiissuteqarnissaannik aallartinnissaq nukingiuttariaqarparput.

Ullumi peqqinnissaqarfitsinni sulisunut pikkorillutik qasujaallutik aalajaallutillu sulisunut nersualaarinnillutalu, qamanga pisumik qujarusuppugut. Ullut tamaasa, ulloq unnuarlu kaajallallugu, ukioq naallugu – allat sininneranni ukiornissaanulluunniit pilineranni aavarnerannilu, juullisiorneranni nalaani annertoorujussuarmik sulijuarpusi. Qujanaq tunniusimallusi naammaginarnerpaanik atugaqanngikkaluarlusi sullissinissinnut, isumassuinissinnut paaqqutarinninnissinnullu. Naliitsuuvusi.



Inuit Ataqtigiit peqqinnissaqarfimik pitsanngorsaajumalluta ukiuni aggersuni atituumik politikikkut akisussaaffimmik tigusinissarput kissaatigaarput. Tamanna qallunaat nunanilu allani peqqinnissaqarnikkut aqqissuussiffiinik qanimut suleqatiginninnissamik pisariaqartitsivoq, taamaalilluta peqqinnissamik sullinneqarnermut ilimagisavut piviusorlu ingerlaqatigiissinnaaqqullugit.

Tamanna ukiup ataatsip marlulluunniit ingerlaneranni anguneqarsinnaanngilaq. Tamanna ungasissumik isigisumik nassaarsiortumik nutaaliortumillu eqqarsarlunilu politikikkut pingaarnersiuinissamik pisariaqartitsiffiuvoq, taamaaliornissamullu akisusnaanissatsinnut piareersimavugut.

## **Attassinissamut Siuariartornissamullu pilersaarut 2**

Attassinissamut siuariartornissamullu pilersaarut 2 uterfigilara. Taanna siunissami atugarissaarnissatsinnik qulakkeerinnillunilu, politikikkut iliuuseqarsinnaassutsitsinnik qulakkeerinnissaaq. Taanna aqqissuusseqqinnermi siunnerfinnik sisamanik ikorfartorneqarpoq.

Aqqissuusseqqinnissat taakku piviusunngortinnissaannut, Inuit Ataqtigiit Inatsisartuni tamanik suleqataanissaaq kissaatigaarput. Suliassarmi taanna pingaaruteqaannanngilaq, suliassalli pissanganartupilussuit utaqqivaatigut. Tassani inuiaqatigiittut unammilligassavut ilungersunartut iliuuseqarfiginiarneqarput, taakkulu oqaaseqaatimma aallaqqaataani taavakka. Taakku sakkugalugit siunissarput nukittorsarsinnaavarput.

Aqqissuusseqqinnissamut siunnerfiit sisamat ukuupput:

Aqqissuusseqqinnissamut siunnerfik 1: Ilinniarsimassutsip piginnaasallu qaffassarnerat.

Aqqissuusseqqinnissamut siunnerfik 2: piujuartitsisumik siuariartorneq, aningaasaqarnermullu arlalinnik tunaartaqartumut ikaarsarneq.

Aqqissuusseqqinnissamut siunnerfik 3: Pisortat ingerlatsiviata siunissamut isumannaarnera.

Aqqissuusseqqinnissamut siunnerfik 4: akileraartarnikkut aqqissuussinermik, ineqarnermut utoqqarnullu atugarissaarnermik aqqissuussinermik iluarsartuussineq.

Aaqqissusseqqinnerit taakku immikkoorlutik ataatsimoorlutillu inuiaqatigiinnik kivitsissapput, taamaalilluta inuusuttavut tamarmik ilinniagaqalersinnaaqqullugit, amerlanerit suliffeqaleqqullugit, pisortani ingerlatsivipput muteerningorsarsinnaaqqullugu, peqqinnissaqarfik ilanngullugu, imminut pilersornerput annertuneruleqqullugu, aamma ineqarnermut tunngatillugu. Minnerunngitsumillu akileraartarnikkut aaqqissusseqqinnermi inuiaqatigiinni aningaasaqarnikkut naligiinnginnerujus-suarput annikinnerulersinneqassaaq.

Akileraartarnermik politikki aqutigalugu naligiinnerusumik agguaasseqqittarnissamut aqutissiueqataaniarluta isumaqatigininniarnernut upernaap ingerlanerani Inuit Ataqtigiinnit peqataavugut. Akileraartarnermut politikki naapertuilluarnerusoq anguniarlugu oqaloqatigiinnerit sukumiisut, angusaqarfiusut ilumoorussisullu peqataaffigaagut. Naatsorsuutigilluinnarparput Aningaasaqarnermut Naalackersuisortaap siulimisulli pimoorussitigaluni kajumissuseqartigalunilu akileraartarnikkut aaqqissusseqqinnissamut suliaq nangikkumaaraa aamma ukioq naatinnagu naapeqatigiilluni isumaqatigiissutissaq atsiorneqarumaartoq. Sapiissuseqarnerup suleriallaqqissutsillu takutinneqarnissaanut piffissanngorpoq. Inuiaqatigiinni erinisuttoqarpoq naligiinnerusumik atugaqalernissamut alloriaqatigiinnissatsinnut, inuuneq tamanut oqinneruleqqullugu.

Nutartereqqinnissamut allannguinissamullu suliassat imartupput. Tamanna pisussaaffiliivoq. Aaqqissueqqinnissamullu tullerriiarinissaq pingaaruteqarpoq. Taakku killiffiannik, tullerriiarneqarnissaannut piffissaliussat ilanngullugit, Naalackersuisut siunnersuutissaannik ujartuivugut.

### **Naggasiineq**

Aaqqissusseqqinnerit arlallit piviusunngortinnissaat pisariaqartipparput. Ilinniarsimassuserput piginnaasavullu pinngitsoornata qaffassartariaqarpavut. Aningaassaqarnikkut piujuartitsisumik siuariartornermut aningaasaqarnermillu

aralinnik tungaveqartumut ikaarsaartariaqarpugut. Pisortat ingerlatsiviisa siunissamut isumannaarnissaannut aningaasanik isertitassanillu nassaartariaqarpugut. Taakkunanilu akileraarusersueriaatsip, isumaginninnikkut ikiorsiissutit, ineqarnermut kiisalu utoqqarnut aaqqissuusseqqinnerit toqqammaviusussaapput. Aaqqissuusseqqinnerit taakku immikkoortitaarlutik ataatsimullu inuiaqatigiitsinnik kivitseqataasussaapput.

Ataatsimut tamaasa isigalugit: Aningaasanut inatsisissatut siunnersuut nunatta aningaasaqarnerata ukiumi aggersumi aqunnissaanut sakkussavoq pitsaasoq patajaatsorlu. Suliarilluagaasimasoq.

Aningaasanulli inatsisissatut siunnersuutip ajornartorsiutinit tunngaviusunit annaassinnaangilaatigut.

Taamaammat partiit akimorlugit ukiuni aggersuni ajornartorsiutigivisatta iliuuseqarfigineqarnissaanut iliuuseqarnissamut sapiissuseqartoqartariaqarpoq. Neriut kissaallu.

Inuit Ataqtigiit siammasissumik suleqatigiinnissamut piareersimavugut.